



Kamis, 12 September 2024
Ogen: Kuan-kuanen 23:19-21



Jadilah Pentar



Menam kerina orang tua ersura-sura gelah anak-anakna jadi kalak pentar. Erbage cara siibahanna guna nehi sura-surana e. Kitik-kitik nari enggo itama i bas PAUD, kenca seh usia sekolah idaftarken ku sekolah si mejilena, gelah terikuti pelajaren sekolah bahan ka les luar jam sekolah, kerina e ilakoken gelah banci kal anak e jadi kalak pentar.

Si nuratken kitab Kuan-kuanen enda pe ersura-sura gelah anak-anak singuda jadi kalak pentar. Nina, maka banci jadi pentar la banci lang e me erkemalangen man Tuhan. Kalak si erkemalangen man Tuhan, merincuh erlajar kerna si mehuli dengen ngelakoken perbahanen si mehuli. Sabap pengajaren Tuhan e kerina mehuli. Telu puluh pertenget isuratkenna nandangi kalak singuda guna mbedaken apai si mehuli si man paken i bas geluhna janah apai ka si la mehuli si perlu itadingken. Salah sada pertenget e gelah megermet i bas erteman. Anak singuda ngasup min mbedaken teman si mejingkat erdahin ras teman si la lit sura-surana erdahin. Si pendahinna mabuk-mabuk ras biakna merangap. Kalak si mekijat erdahin, ras mabuk-mabuk ngenca dahinna, musil me kedungenna. Kalak sierkemalangen man Dibata, tehna muat teman si mehuli, si mabai ia ku si mehuli. Janah, perbahanenna pe mehuli. Lit kata Dibata i bas pusuhna si ngajar-ngajari ia tetap ngelakoken si mehuli. Orang tua me jadi guru hikmat nandangi anak singuda i bas jabu ras masyarakat. Kata Dibata e me si mpengasup ia pentar erteman, pentar erdahin, pentar muat keputusan dengen pentar encibalken perbahanen si mehuli. I bas HUT PERMATA GBKP, arapenta anak-anak GBKP reh rembakna ku Dibata. Reh belinna karakter si mehuli i bas ia, jujur, mejingkat, dengen ertanggungjawab.